

მიხეილ ბახტაძე, ისტორიის მეცნიერებათა დოქტორი. თსუ.

მანუჩარ II ჯაყელი

ნაწილი 1

1582 წლის სექტემბერში სამცხეში მყოფმა ოსმალთა სარდალმა ჰადიმ მეჰმედ ფაშამ სამხედრო თათბირი მოიწვია. სხვებთან ერთად ახალციხის, იგივე ჩილდირის საფაშოს გამგებელი მუსტაფაც დაიბარეს. თათბირის ოფიციალური მიზეზი სტამბულიდან მიღებული ახალი ბრძანების გაცნობა იყო. სინამდვილეში ოსმალთა სარდალებს მუსტაფას მოკვლა ქონდათ განზრახული. ჰადიმ ფაშამ ცოტა ხნის წინ, მუხრანთან ქართლს მეფე სვიმონ I-თან, განცდილი მარცხი სწორედ მუსტაფას დააბრალა და შურისძიება ჰქონდა გადაწყვეტილი<sup>1</sup>.

მუსტაფა გამაჰმადიანებული მანუჩარ ჯაყელი იყო. ფრთხილმა და წინდახედულმა ჯაყელმა, რომელიც ოსმალთა სარდალებს არ ენდობოდა, თან 50 ერთგული მეომარი წაიყვანა და თათბირზე გამოცხადდა. კარავში შესულმა მუსტაფამ იკითხა, „რას მიბრძანებთო. მას რაღაც განკარგულება წაუკითხეს. მანუჩარმა შესრულება აღუთქვა და გამოსვლა დააპირა. ამ დროს ერთმა თურქმა სახელოთი მოსწია და დაკავებას უპირებდა. მანუჩარმა ხმამაღლა დაიყვირა, თავდამსხმელს ხმალი გამოსტაცა და მის წინ მდგომ ფაშას თანაშემწეს ისეთი სიძლიერით დაარტყა, რომ თავიდან მუცლამდე გააპო. გააფთრებულ მანუჩარს ხუთი ჭრილობა მიუყენებია თვით მეჰმედ ფაშასთვის. სწორედ ამ დროს შემოვარდნილან მანუჩარის კაცები, რომლებსაც ის გადაურჩენიათ.“<sup>2</sup>

მანუჩარმა ისლამი უარყო, კვლავ გაქრისტიანდა, სვიმონ I-ს დაუკავშირდა და საათაბაგოში ოსმალთა წინააღმდეგ აჯანყებას ჩაუდგა სათავეში.

მანუჩარი 1550 წელს დაიბადა. მამამისი მესხეთის მთავარი, ათაბაგი ქაიხოსრო II იყო. დედა, დედისიმედი კი მუხრანელ ბაგრატიონთა საგვარეულოს ეკუთვნოდა. ოცდასამი წლის იყო მანუჩარი, როდესაც 1573 წელს ქაიხოსრო ყაზვინში გარდაიცვალა. ვახუშტი ბატონიშვილი წერს, „ყაზიმინს ყოფასა შინა მოკუდა ათაბაგი ქაიხოსრო ... და დაუტევა ძენი ყუარყუარე, მანუჩარ და ბექა“<sup>3</sup>. ამ დროს მძიმე პერიოდი ედგა საათაბაგოს. მესხეთის სამხრეთ-დასავლეთი მხარეები ოსმალებს ქონდათ დაპყრობილი და სულთნის ხელისუფლება მთელი საათაბაგოს დაუფლებას ლამობდა. ოსმალთა

<sup>1</sup> მ. სვანიძე, საქართველო-ოსმალეთის ურთიერთობის ისტორიიდან XVI-XVII. 1977 წ. თბ. გვ. 152

<sup>2</sup> საქართველოს ისტორიის ნარკვევები ტ.4 თბ. 1973 წ. გვ. 135

<sup>3</sup> ვახუშტი ბატონიშვილი, აღწერა სამეფოსა საქართველოსა. „ქართლის ცხოვრება“ ტექსტი დადგენილი ყველა ძირითადი ხელნაწერის მიხედვით ს.ყაუხჩიშვილის მიერ ტ. IV 1973 წ. თბ. გვ. 718

აგრესიის შესაჩერებლად ქაიხოსრო II ირანის გამოყენებას აპირებდა და სწორედ ამიტომ იმყოფებოდა შაჰის კარზე ყაზვინში.

ქაიხოსროს გარდაცვალების შემდეგ ათაბაგი უფროსი ვაჟი ყვარყვარე IV გახდა. „ქვეყნის ფაქტიური მმართველი დედამისი, ქაიხოსროს ქვრივი ენერგიული პოლიტიკური მოღვაწე და ძალაუფლების მოყვარული ქალი - დედისიმედი იყო.“<sup>4</sup> აქტიურად აღმოჩნდა ჩართული საათაბაგოს პოლიტიკურ ცხოვრებაში მანუჩარიც.

1576 წელს საათაბაგოში ჯაყელთა წინააღმდეგ დიდი აჯანყება დაიწყო, რომელსაც სათავეში შალიკაშვილები ედგნენ. ქართული წყაროების ერთი ნაწილის მიხედვით, კახეთის მეფის ალექსანდრე II-ის სახლთუხუცესმა ჩოლოყაშვილმა კარს მომდგარი ყიზილბაშების შემოსევის თავიდან აცილების მიზნით მეფეს შემდეგი რჩევა მისცა - დედისიმედს ვაცნობოთ ვითომ „ვარაზას (შალიკაშვილს - მ.ბ.) შაჰ-თამაზ ყაენი მანდ მოჰყავსო, ნებავს ამოწყუეტა სამცხისაო და ძისა შენისაო მანუჩარის სიკუდილიო, და მრავალგზის მოგაყივნა ქუეყანასა ზედაო და თვთონ უნდა ეგ ქუეყანა დაიჭიროსო. და მანდ გაბატონდესო. და დაიჭირე ვარაზა, მოჰკალ და მერმე შაჰ-თამაზ ყაენი ვეღარ მოვა და გაბრუნდება და წავა და მორჩება ქუეყანაო“. დედისიმედმა დაიჯერა, „შეიპყრა ვარაზა შალიკაშვილი ღალატითა და მოკლა. ესე ვარაზა იყო შვილი ოთარ შალიკაშვილისა და ცოლის-ძმა შაჰ-თამაზ ყაენისა. და რა ესმა შაჰ-თამაზს სიკუდილი მისი, განწერა შაჰ-თამაზ და წარვიდა სამცხეს და დაუტევა კახეთი. და შევიდა სამცხეს, და მოაოჭრა და ამოსწყუეტა სამცხე და მრავალი ბოროტი შეამთხვა სამცხესა, და შემდგომად ამისსა შემოიქცა და წარმოვიდა.“<sup>5</sup>

ვარაზა შალიკაშვილი მამასავით ამაყი და პატივმოყვარე იყო. ჯაყელებს არაფერში ტოლს არ უდებდა და მის გარეშე სამთავროში ბევრი ვერაფერი წყდებოდა. შალიკაშვილის მოკვლის რეალური მიზეზი, სავარაუდოდ, მისი გავლენა და ძალა იყო და არა კახეთიდან ჩოლოყაშვილის მიერ შემოთვლილი ამბავი. შალიკაშვილებს სხვებიც მიემხრნენ: ამატაკიშვილები, დიასამიძეები, თუხარელები და სხვ. მალე მესხეთი სამოქალაქო ომის ხანძარში გაეხვია.

მესხეთში განვითარებული მოვლენების შესახებ უპირველეს წყაროს „მესხური მატიანე“ იგივე „მესხური დავითნის ქრონიკა“ წარმოადგენს. მასში დაცული ინფორმაციის თანახმად, „ივნისა, ათაბაგი პატრონი ყვარყვარე და ძმა მათი პატრონი მანუჩარი და ბიძაშვილი მათი მეფისშვილი პატრონი ჰერაკლე<sup>6</sup> მგელციხეს წავიდეს ყაენთან ელჩის გასაგზავნელად. ავკარგად სამოცამდის კაცი იახლა. სამწუბთ ღელეში დავდეგით. აცნობაჲ ოლადის ქუაბიდამა ბედანისშვილმა იასონ ვარაზაშვილს

<sup>4</sup> საქართველოს ისტორიის ნარკვევები გვ. 125

<sup>5</sup> ახალი ქართლის ცხოვრება გვ.

<sup>6</sup> საუბარია დედისიმედის ძმის არჩილი ბაგრატიონის (მუხრანის შტო) ვაჟზე ერეკლეზე.

კოკოლასა და მის ძმასა ლაშქარასა და მის ბიძას გურგაქს. იახლნეს თანა დიასამისძის ელიას შვილი ავთანდილ და მისი ძმა შერმაზან, ამატკისშვილის როსტომის შვილი ამატაკ და აბდუყაფარ და მათი ძმისწული როსტომ და ამატკის ვაჟი სეხნიაჲ. დაეკაზმნეს ხუთასამდი კაცი და წარმოვიდეს და ორთვალთვიდს გამოვიდეს, ბორგს მივიდეს. იქ ფანასკერტელი იობის შვილი ჯირასონ გუჭრც იახლა, საუბარს შეესწრა კაცსა, თუ - გულმართლა ბატონებზე თავს დასასხმელად და დასაჯოცლად მიდიანო. იარა და აცნობა უგუბოს დოლენჯიშვილს ყანდურალის, თუ - გულმართლა ბატონიშვილებს დაჰკოცენ! ფიცხლა აცნობა! წამოვიდა ყანდურალი, აცნობაჲ ბატონებსა. ქათამს ეყვილა. ადგეს ბატონები და ვინც იყო, დაეკაზმნეს. ოცამდე შეკაზმული კაცი იყო.<sup>7</sup> ჩვენი აზრით, მჯაყელები აჯანყებას არ ელოდნენ, მაგრამ მცდარია მოსაზრება, თითქოს თავიდან ისინი მოულოდნელობისგან კარგა ხანს დაბნეული ყოფილან.<sup>8</sup> უბრალოდ თავისი მომხრეების შესაკრებად მჯაყელებს გარკვეული დრო დასჭირდებოდათ.

„ივნის ლ (30), შაბათს დღის განთიად დაესხნეს ნასადგომევსა. სხვაჲ აღარა დახუდა რა: თუხარლიანთ კარავი და ბარგი დახუდა და ის დაიფორაქეს; ჯორები კიდეჲ მოსცეს. ჩვენი და მათი კაცი გარდაიკიდნეს; ერთი მოკლეს და ერთი ჳელ დაიჭირეს ჩუნთა. წავიდეს გაწბილებულნი. ეკუჭხა - არ გაგუსწრობოდეს, თავებს დავსჭრიდით და მკუდარს ასო-ასო ავიქმოდით. და ეს გუჭქნა, მარტულილებსაც არ გაუშუჭბდით ცოცხალსა.

დავარდა ჳმაჲ. დაიწყო ჩუნმა ლაშქარმა მოდენა. გაემართნეს პატრონი ყუარყუარე და პატრონი მანუჩარი და ჳერაკლე სახელსა ზედა ღთისასა და მივედით ზედა-თმოგუს. და თმოგუის ქალაქი მოვარბიეთ და იქივე ზედა-თმოგუს ამოვედით და პატრონი დედა მათი, დედისიმედ ყოფილი დებორა იქ მოვიდა. და ორშაბათს ვანის-ქუაბს მოვადეგით და ოთხშაბათს იერიშით ავიღეთ და პარასკევს დღეს ავიყარენით, ჩაუდევით, რჩეულიანი შემოვიწყუჭნით.“<sup>9</sup>

აღსანიშნავია, რომ ამ შინა ომიში ძალიან აქტიურად მონაწილეობს მანუჩარი. ის ხან დამოუკიდებლად მოქმედებს, ხანაც უფროს ძმასთან ერთად. ყვარყვარე კი ცალკე არაფერს აკეთებს და მხოლოდ მანუჩართან ერთად იბრძვის. ყოველივე ეს გვაგვარაუდებინებს, რომ მანუჩარი თავისი პირადი თვისებებით (ვაჟკაცობა, ენერგიულობა, გამჭრიახობა და სხვ) აღემატებოდა ძმას. ფაქტობრივად ის არის მჯაყელთა საგვარეულოს რეალური ლიდერი ამ ბრძოლების დროს.

„ამავე ქორანიკონსა სდდ (1576 წელი 1312+264), აგვსტოს ოცდაათერთმეტსა ვარნეთის ციხეს უღალატეს მგელციხიდანა და ენკეთისთუჭს ოთხსა პატრონი მანუჩარ და პატრონი ერეკლე, მათი

<sup>7</sup> ქ. შარაშიძე სამხრეთ საქართველოს ისტორიის მასალები (XV-XVI სს.) 1961 წ. თბ. გვ. 43

<sup>8</sup> შარაშიძე გვ. 154

<sup>9</sup> შარაშიძე გვ. 44

ბიძაშვილი, მგელციხეს იყვნეს და შალიკაანთ აზნაურიშვილებს თავს დაესხნეს. აზნაურიშვილები გარდაეხუჭუნეს . . . ქორანიკონსა სვე (1577 წელი) მარტში, მოგვკდა კოკოლა და ახჩიის ქუაბი წაგუართუა. წავიდა ბატონი მანუჩარ და იმავ წამს წაართუა. ერეკლე თან ახლდა. მერმე გურგაქ უკუდგა კოკოლას, თავის ძმისწულსა და ბატონს მანუჩარს შემოჰფიცა, ქაჯისციხე უკმოუჭირა. მერმე ფიცი გაუტეხა და კიდეე უკუდგა ბატონს მანუჩარს. უკმოზრუნდა ბატონი მანუჩარ; ჩაუდეგით კიდეე გახაფხულზე, ვეუბნეთ. არ შემოგაუჭწყუნეს. დაურბიეთ ფოსო.“<sup>10</sup>

„ბოსტოდანაშვილმან მატამა უხუცესი მისი ძმა მოკლა, ათამირმა ერქუა. წამოვიდა ბატონი მანუჩარ, დაიჭირა მატაი და თუალები დასწუა მას და მისთან მყოფთა ყმათა. მოზრუნდა ბატონი მანუჩარ, მგელციხეს მოვიდა, ბატონი ყუარყუარე და ბატონი მანუჩარ იქ დადგეს და ბატონი დედისიმედი წამოვიდა, ახალციხეს მოვიდეს . . . ქრისტიშობისათუეს ოცდათერთმეტს ბატონი ყუარყუარე და ბატონი მანუჩარ თმოგუს მოადგეს, სამშაბათს დღესა. იანვარსა ე (5) კუირას დღესა, ქორანიკონსა სვე (1578 წელი) პატრონი დედისიმედი და ბატონი ბექა ყუჭლს მოადგეს. ამასვე იანვარს ზ (8) ოთხშაბათს თმოგუი წაართუჴს და აქეთ იმავ დღეს წავართუით ... შშეიყარა კოკოლამ ყარახან, წამოვიდა თმოგუზე მასაშუჭლებლად, ვედარ მოესწრა. ციხე ორიე წაერთმევიანა. ყუჭლიდამ თმოგუს წავიდა ბატონი დედისიმედი. იქიდამა ბატონი მანუჩარ ჯავახეთს წავიდა. ფოსო და ჯავახეთი დაარბივა და გურგაქს ქაჯისციხე გაუზარაქიანა. ბატონი ყუარყუარე და ბატონი მანუჩარ ახალციხეს წამოვიდა და ბატონი დედისიმედი თმოგუს დადგა.“<sup>11</sup>

ამასობაში შეიცვალა ვითარება საქართველოს სამხრეთ საზღვრებთან. 1578 წელს ოსმალთა სულთანმა მურად III-მ ირანის წინააღმდეგ ახალი ომი დაიწყო. „მესხური მატაიანეს“ მიხედვით, შეტაკებები ოსმალებსა და ყიზილბაშებს შორის ჯერ კიდეე თებერვალში დაიწყო. „პატრონი მანუჩარ და პატრონი ერეკლე - ლაშქარი შეიყარეს - წავიდეს, ურუმთ პირს მიუდგეს“. მაგრამ ბრძოლაში არ ჩარეულან. „მოზრუნდა ბატრონი მანუჩარ და აწყუჭრს ჩამოვიდა“.<sup>12</sup>

სულთანმა სარდლად ლალა მუსტაფა ფაშა დაინიშნა. ფაშამ საბრძოლო მოქმედებების დაწყების წინ ქართველ მეფე-მთავრებს წერილები დაუგზავნა, მორჩილება და ირანის წინააღმდეგ ომში მონაწილეობის მიღება მოსთხოვა. 5 აგვისტოს ლალა მუსტაფა ფაშა არტაანში ჩავიდა და ფაქტობრივად ჯაყელთა საგამგებლოს საზღვარს მიადგა.<sup>13</sup>

საათაბაგოს მმართველი ამ დროს ყვარყვარე IV იყო, თუმცა ოსმალთა სარდალმა მის ძმას, მანუჩარს გაუგზავნა წერილი. მკვლევართა ნაწილი თვლის, რომ „თურქეთის სარდალმა, ცხადია,

<sup>10</sup> შარაშენიძე გვ. 45

<sup>11</sup> შარაშენიძე გვ. 46-47

<sup>12</sup> შარაშენიძე გვ. 47

<sup>13</sup> სვანიძე გვ. 103

კარგად იცოდა რა დიდი მნიშვნელობა ექნებოდა მისი ლაშქრობის წარმატებისათვის საათაბაგოს მმართველ წრეებში არევ-დარევის შეტანას, მათს ზნეობრივად მოშლას. აი რატომ მიმართა მან ზემოთ აღნიშნულ წერილებით მანუჩარს. ეს დამპყრობლების ჩვეულებრივი ხერხი იყო. მაგრამ საყურადღებოა, რომ ადრესატად მან აირჩია არა ათაბაგი ყვარყვარე IV და არც მისი დედა პოლიტიკური ამბების მხურვალე მონაწილე დედისიმედი, არამედ მანუჩარი. ეტყობა მას წინასწარვე ჰქონდა ცნობები ამ პიროვნების ზნეობრივი ავლადიდებისა და მისი უზომო მთავრობისმოყვარეობის შესახებ<sup>14</sup>.

ქართულ ისტორიოგრაფიაში გამოთქმულია მოსაზრება, რომ ყვარყვარესა და მანუჩარს შორის დამაბული ურთიერთობა იყო და მანუჩარი ძმას „ხელისუფლებას ეცილებოდა“<sup>15</sup>.

სანამ ჯაყელთა საგვარეულოში არსებულ თუ არ არსებულ დაპირისპირებაზე ვისაუბრებთ უნდა გავიხსენოთ თუ რა ვითარება იყო მესხეთში ლალა მუსტაფა ფაშას შემოსევის წინ. ცოტა ხნის დამთავრებული იყო სასტიკი და სისხლისმღვრელი ომი ჯაყელებსა და მათ მოწინააღმდეგე ფეოდალებს შორის. ერთიანობს გარეშე ამ ომში ჯაყელები ვერ გაიმარჯვებდნენ. ამ შინაომის დროს ძმები ერთად იბრძვიან და მათ შორის არანაირი წინააღმდეგობა არ ჩანს.

ქრისტინე შარაშიძე მართებულად აღნიშნავს ლალა ფაშას სურვილს, ჯაყელთა შორის უთანხმოების ჩამოგდების შესახებ. ამის გაკეთება კი მართლაც მხოლოდ ერთი გზით შეიძლებოდა - მანუჩართან დაკავშირებით. წერლის მიწერა ყვარყვარესადმი სრულიად გასაგები იქნებოდა და საგვარეულოში ურთიერთდაპირისპირებას არ გამოიწვევდა. არ არის აუცილებელი, რომ ძმებს შორის წინააღმდეგობა და ცილობა ყოფილიყო. ოსმალო სარდალს უბრალოდ სხვანაირად ჯაყელთა შორის დაპირისპირების გამოწვევა არც შეეძლო.

გასათვალისწინებელია კიდევ ერთი რეალობა. სავარაუდოა, რომ მანუჩარი თავისი პიროვნული თვისებებით ძმას აღემატებოდა კიდევ და ფაშამ ამიტომაც მიმართა მას, როგორც სამხედრო საქმეში უფრო გამოცდილსა და გამოსადეგს. ამას თომაზო მინადოიც ადასტურებს - „მანუჩარმა მუსტაფას ლაშქრობის ცხოვრება გაიზიარა და მეომრის აშკარად გამოსახული თვისებები გამოავლინა“<sup>16</sup>. შემდგომში განვითარებული მოვლენები მართლაც დაადასტურებენ მანუჩარის ვაჟკაცობას, ენერგიულობას, გამჭრიახობას.

მანუჩარსა და ლალა ფაშას შორის აქტიური მიწერ-მოწერა გაიმართა. ფაშა „მოითხოვს მანუჩარისაგან მორჩილებას. წინააღმდეგ შემთხვევაში ჰპირდება ქვეყნის სრულ განადგურებას.

---

<sup>14</sup> შარაშიძე გვ 166-167

<sup>15</sup> სვანიძე გვ. 103

<sup>16</sup> ჯოვანი თომაზო მინადოი. ტექსტი თარგმნა ბ.გიორგაძემ (ინახება ხელნაწერთა ეროვნულ ცენტრში) გვ. 66

შემდეგ მოდის კონკრეტული წინადადება, თუ რაში უნდა გამოიხატოს ეს მორჩილება: ოსმალეთის ჯარი მოამარაგოს საომარი იარაღით, სურსათ-სანოვაგით და ოსმალებთან ერთად მონაწილეობა მიიღოს ლაშქრობაში და მეგზურობა გაუწიოს მას. ყოველივე ამის საფასურად, ლალა მუსტაფა ფაშა მანუჩარს პირდება, რომ მისი ქვეყანა დაცული და გაშენებული იქნება.<sup>17</sup>

ჯაყელის ამ მუქარით შეშინება ძნელი იქნებოდა. თანაც, მანუჩარი ალბათ კარგად ხვდებოდა რომ შექმნილ პოლიტიკურ ვითარებაში ოსმალებთან „ვაჭრობა“ და უკეთესი პირობების მიღება სავსებით რეალური იყო. მანუჩარი საპასუხო წერილში „მოითხოვდა არა მარტო მის მფლობელობაში მყოფი მამულების შენარჩუნებას, არამედ კიდევ უფრო მეტი, მას სურდა დაებრუნებინა ის ადგილები და ციხეები რომლებსაც ადრე მისი წინაპრები ფლობდნენ“. მუსტაფა ფაშა მანუჩარის მოთხოვნებს დათანხმდა. თუმცა აღნიშნა, რომ ყველაფერი ეს მხოლოდ მას შემდეგ მოხდებოდა, რაც მანუჩარი საქმით დაამტკიცებდა თავის ერთგულებას. მოლაპარაკება კვლავ გაგრძელდა. ჯაყელი ამჯერად „მოითხოვდა, რომ ოსმალებს ხელი არ ეხლოთ ადგილობრივი მოსახლეობისა და რელიგიისთვის. საპასუხოდ ლალა ფაშა წერდა, „თქვენ თვითონ, თქვენს ქვეშევრდომებს, ციხეებს, ნაპიებსა და თქვენს ჯარისკაცთაგან არავითარი გზით არავინ არ გაეკარება და წინააღმდეგობას არ გაუწევს. თქვენ თვითონ ბედნიერად იქნებით და თქვენი ქვეშევრდომები კეთილდღეობაში იქნებიან. თქვენს მფლობელობაში მყოფი ადგილები, ისევე როგორც უწინ, თქვენს განკარგულებაში იგულები“.<sup>18</sup>

ამაზე უკეთესი პირობების მიღება ოსმალთაგან შეუძლებელი იყო. სხვა საკითხია, ჯეროდა თუ არა მანუჩარს, რომ ოსმალები პირობას ბოლომდე შეასრულებდნენ.

არსებობდა მეორე გზაც, ომის გზა - ოსმალებთან ბრძოლის დაწყება. მანუჩარი სავარაუდოდ კარგად ხვდებოდა, რომ მარტო საათაბაგოს (თანაც თითქმის ორწლიანი შიდა ომის შემდეგ) ოსმალთა წინააღმდეგ ბრძოლა არ შეეძლო. საერთო ქართული კოალიციის შექმნა თითქმის შეუძლებელი იყო. ომის გზა საათაბაგოს აოხრებასა და მოსახლეობის გაწყვეტას ნიშნავდა, უეჭველ დამარცხებასთან ერთად. ასე რომ რეალურად ასარჩევად არაფერი იყო.

ამასობაში ოსმალთა ჯარი საქართველოს საზღვრებში შემოვიდა. „მარიამობისთუღს ზ (7) ხუთშაბათს დღესა ხუანთქრის ლაშქარი და ლალაფაშა მგელციხის ციხეს მოადგეს, შეიბნეს. სამშაბათამდის ყოველთ დღეთ ომში იყუნეს ციხიანი. გოგორიშვილი როინ და მისი ძმა ბერი ერუშნელი და მისი ძმისწული ზურაბ იყუნეს, მათის ყმითა და ღთის შეწევნით უკუყარნეს და ციხე

<sup>17</sup> სვანიძე გვ. 105

<sup>18</sup> სვანიძე გვ. 106

ჩუენვე დაგურჩა, ჩუენტ გაემარჯუა. პარასკევს დღესა, ზ (8) მარიამობისთუჴსა ქაჯის ციხე, ველი და თეთრციხე წაგუართუჴს ურუმთა და ქაჯის ციხის მეციხოვნენი სრულად შემოეკოცნეს.“<sup>19</sup>

ოსმალო ისტორიკოსისი იბრაჰიმ ფეჩევის მიხედვით, ლალა ფაშა „(9 აგვისტოს) არტაანიდან დაიძრა და ველე-ს ციხის მახლობლად დაბანაკდა. შესაძლებელი გახდა ამ ციხის ადვილად დაპყრობა. მეორე დღეს ჯარი იენი-ყალას უსწორმასწორო ადგილებში დაბანაკდა. ეს ციხე მდებარეობს ორ მთას შუა, მაღალი გორაკის მწვერვალზე. მაღალი ალაჰის შემწეობით სასტიკი ბრძოლის შემდეგ ციხე აღებულ იქნა შუადღემდე“<sup>20</sup>. ჩვენი აზრით ქართველი მემატიანე უფრო ზუსტ ცნობებს იძლევა. საყოველთაოდ ცნობილია, რომ 9 აგვისტოს ჩილდირის ბრძოლა გაიმართა. ნაკლებად სავარაუდოა, რომ 9 აგვისტოს არტაანიდან გამოსულ ოსმალთა სარდალს, იმავე დღეს გადამწყვეტი ბრძოლა გაემართა მოწინააღმდეგესთან.

1578 წლის 9 აგვისტოს ჩილდირთან, ირან-ოსმალეთის მეორე ომის გადამწყვეტ ბრძოლაში ოსმალებმა ყიზილბაშთა და ქართველთა გაერთიანებული ჯარი დაამარცხეს. „მანუჩარი ექვსი ათასი შეიარაღებული აზნაურით მთის ფერდობიდან გამარჯვებულებს და დამარცხებულებს თვალყურს ადევნებდა. იდგა იქ და იმედი ქონდა, რომ გამარჯვებული მხარე მას შეიწყნარებდა“.<sup>21</sup>

ქართული ისტორიოგრაფიაში აღნიშნულია, რომ ოსმალთა სარდალი „დიდი მნიშვნელობას ანიჭებდა მანუჩარის მხარდაჭერას ირანელების წინააღმდეგ ბრძოლაში. დონ ხუან სპარსელის ცნობით, ლალა მუსტაფა ფაშამ მანუჩარი დიდი ალერსით მიიღო და ამის შესახებ სულტანს აცნობა, როგორც უაღრესად მნიშვნელოვანი მოვლენა, მომავალი დიდი ამბების დასწყისის კარგი მომასწავლებელი.“<sup>22</sup>

რა მნიშვნელობა ჰქონდა მუსტაფა ფაშასთვის მანუჩარის მხარდაჭერას? ჯაყელი კარგი სარდალი და უბადლო მეომარი იყო. მისი 6 000 მეზომოლიც ხელწამოსაკრავი ძალა არ იყო. თუმცა ჩილდირის ბრძოლაში მოპოვებული დიდი გამარჯვების შემდეგ ოსმალები მანუჩარის გარემოც შემლებდნენ დასახული ამოცანის შესრულებას. ეგებ მუსტაფა ფაშას მანუჩართან ურთიერთობა ჭირდებოდა როგორც მაგალითი სხვა ქართველი მეფე-მთავრებისთვის, რომ თუ ისინიც ჯაყელივით მოიქცეოდნენ არაფერი დაემუქრებოდათ. გარდა ამისა, ცხადია ოსმალთა სარდალი მანუჩარის დახმარებით საათაბაგოს უბრძოლველად დაკავებას ცდილობდა.

„მანუჩარის მოსვლამ ოსმალთა ბანაკში გააორკვეა მუსტაფას სიხარული. მან ბრძანა, რომ ყველა ფაშა და ჯარის ნაწილების სხვა მეთაურები სრული წესრიგით, დიდი ზეიმით, საყვირების

<sup>19</sup> შარაშიძე გვ. 47

<sup>20</sup> ს.ჯიქია, ირაჰიმ ფეჩევის ცნობები საქართველოსა და კავკასიის შესახებ. 1964 წ. თბ. გვ. 39

<sup>21</sup> საქართველოს ისტორიის ნარკვევები გვ. 132

<sup>22</sup> სვანიძე გვ. 109

დაკვრით, ზარბაზნების სროლით და სიხარულით მიგებებოდნენ მანუჩარს და მას წინ გაძლოდნენ მანამ, სანამ მანუჩარი მივიდოდა ლალა ფაშას კარავში. როცა მანუჩარი გამოცხადდა მუსტაფასთან, ამ უკანასკნელმა, თავის მხრივ, გაამეორებინა ზარბაზნებისა და თოფების სროლა და საყვირებისა და დაფდაფების ხმაური. მართალია, ლალა ფაშამ მანუჩარი დიდი სიხარულითა და პატივით მიიღო და საზეიმო შეხვედრა გაუმართა, მაგრამ იქვე უსაყვედურა და დასძინა, რომ მისთვის კიდევ უფრო სასიამოვნო იქნებოდა, თუ იგი მის მოწოდებას დროზე გამოეხმაურებოდა და მასთან დაუყოვნებლივ გამოცხადდებოდა<sup>23</sup>

მართებულია ისტორიოგრაფიაში გამოთქმული მოსაზრება, რომ ჯაყელებსა და ოსმალთა სარდალს სხვადასხვანაირად ესმოდათ თუ რას ნიშნავდა საათაბაგოს მორჩილება „ბრწყინვალე პორტასადმი“.<sup>24</sup> თითოეული მხარე „მორჩილების“ გაგებაში იმ შინაარსს დებდა რაც თვითონ აწყობდა. მანუჩარი - მაქსიმალურ დამოუკიდებლობასა და მინიმალურ დაქვემდებარებას, ხოლო სულთნის კარი პირიქით - მინიმალურ დამოუკიდებლობასა და მაქსიმალურ დაქვემდებარებას.

ამასობაში ოსმალები მესხეთის ციხეების დაკავებას განაგრძობდნენ. „იმავე კუირას, ი (10) მარიამობისთუჴსა, პატრონი მანუჩარ ქაჯის ციხეს შეეყარა. ვერც ლაშქრის ომსა და ვერც ციხეების აღებას ვერ მიესწრა. ამილახორიშვილი ქოიარ მიეგებად არტანს და ორი ციხე მან შესძლუნა ლალაფაშასა მარიამობისთუჴსა ორსა. აგრეთვე არფაქსად ჰპირებოდა ექუსით ციხეთა მას წინათ და ხერთვისი და ხუთი ციხე მას შეეძლუნა და პატრონს მანუჩარს თან მიჰყუა, იმწამს გამოჰყარეს, ციხეები გამოართუჴს და ხახული სასანჯახოდ მისცეს. პატრონმა მანუჩარ იზ (17) ამავე თუჴსა თმოგუის ციხე მისცა ლალაფაშასა.“<sup>25</sup> თმოგვი შალიკაშვილთა ერთ-ერთი მთავარი ციხე-სიმაგრე იყო. სავარაუდოდ იქ კოკოლა შალიკაშვილის მეციხოვნეები იდგნენ და საინტერესოა როგორ „გადასცა“ მანუჩარმა ოსმალებს შალიკაშვილების ციხე? აქ ალბათ იგულისხმება ფორმალური გადაცემა.

ქ.შარაშიძე წერს, „სად იმყოფება მანუჩარ 1578 წლის მარტიდან მარიამობის თვის 10 რიცხვამდე, არ ჩანს. „მატიანე“, საერთოდ სდუმს ამ საბედისწერო ხუთი თვის ამბების შესახებ“. მკვლევარის აზრით, მანუჩარი ლალა ფაშასთან 2 აგვისტოზე ადრე მიდის, არფაქსად ამატაკიშვილთან ერთად და ოსმალებს ექვს ციხეს, მათ შორის ხერთვისს, უძღვნის. საბოლოოდ მეცნიერი აკეთებს დასკვნას, რომ „მანუჩარის ყოველი ნაბიჯი 1578 წლის მარტიდან მოყოლებული, როდესაც იგი ბრძოლის ველიდან მობრუნდა და აწყურს ჩამოვიდა, ამავე წლის მარიამობისთვის (აგვისტოს) 17-დის,

<sup>23</sup> სვანიძე გვ. 110

<sup>24</sup> სვანიძე გვ. 110

<sup>25</sup> შარაშიძე გვ. 48-49



როცა მან თმოგვის ციხე მისცა ლალა-ფაშას, გამცემლობით არის აღბეჭდილი.<sup>26</sup> მძიმე ბრალდებაა. ჩვენ შევეცდებით დაწვრილებით გავერკვეთ მოვლენათა თანმიმდევრობაში, რადგან ამას დიდი მნიშვნელობა აქვს.

ქ.შარაშიძე ეყრდნობა ჰამერის (Hammer) ცნობას, რომ მანუჩარი ჩილდირის ბრძოლამდე ორი კვირით ადრე მივიდა ლალა ფაშასთან.<sup>27</sup> სავარაუდოდ ჰამერის ცნობა მცდარია. მას არ ადასტურებენ სხვა წყაროები. იბრაჰიმ ფეჩევის თანახმად, „ხსენებული ბეგი ექვსი ათასი შეიარაღებული აზნაურით მოვიდა და მთის ფერდობიდან გამარჯვებულებს და დამარცხებულებს თვალყურს ადევნებდა. იდგა აქ და იმედი ჰქონდა, რომ გამარჯვებული მხარე მას შეიწყნარებდა. და როგორც კი გაიგო, თუ რა ბედი ეწია თოქმაქ-ხანს, წამოვიდა მანუჩარი დილას და ღირსეული სარდლის კარავში შეაღწია“<sup>28</sup>. თუ მანუჩარი ჩილდირის ბრძოლამდე გამოცხადდა ოსმალებთან, გადასცა მათ ციხეები ანუ თავი მათ ვასალად აღიარა, განა გასაკვირია არაა, რომ ჩილდირის ბრძოლაში ოსმალებს არ ეხმარება? ჩილდირის ბრძოლის დროს მისი საქციელი იმაზე მიუთითებს, რომ მას კავშირი ჯერ არც ერთ მხარესთან არ აქვს და მოვლენათა განვითარებას ელოდება.

„მესხური მატიანეს“ მიხედვით 2 აგვისტოს ქოიარ ამილახორიშვილი არტაანში შეხვდა ოსმალებს და ორი ციხე გადასცა. 7 აგვისტოს ოსმალები მგელციხეს შემოადგნენ მაგრამ ვერ აიღეს. 8 აგვისტოს კი მათ ქაჯის ციხე, ველის ციხე და თეთრციხე აიღეს. 9 აგვისტოს გაიმართა ჩილდირის ბრძოლა. 10 აგვისტოს მანუჩარი ქაჯის ციხეს „შეეყარა“, მაგრამ ცხადია იქ მას ოსმალთა გარნიზონი დახვდებოდა (ქაჯის ციხის დამცველები ყველანი ბრძოლაში დაიღუპნენ). 17 აგვისტოს მანუჩარი ოსმალებს თმოგვის ციხეს გადასცემს. უცნობია როდის მივიდნენ არფაქსადი და მანუჩარი ოსმალებთან. მემატიანის სიტყვებიდან გამომდინარე - „პატრონს მანუჩარს თან მიჰყუა“ - ქ.შარაშიძე ვარაუდობს რომ მისვლისა და ექვსი ციხის გადაცემის ინიციატორი მანუჩარი იყო და არა არფაქსადი. მატიანეში ჯერ წერია, რომ 2 აგვისტოს ქოიარ ამილახორიშვილი მივიდა ოსმალებთან და მერე აღნიშნული არფაქსადისა და მანუჩარის მისვლა „ურუმებთან“. აქ გასათვალისწინებელია, რომ ქოიარის მისვლის ამბავი 10 აგვისტოს განვითარებული მოვლების აღწერას მოსდევს, ანუ დარღვეულია თხრობის ქრონოლოგია. ამიტომ ძნელი სათქმელია არფაქსადის და მანუჩარის მისვლა ოსმალებთან ზუსტად როდის მოხდა.

---

<sup>26</sup> შარაშიძე გვ. 163-166

<sup>27</sup> შარაშიძე გვ. 165

<sup>28</sup> ჯიქია, გვ. 41

ჩვენი აზრით, მოვლენები შემდეგნაირად განვითარდა: 2 აგვისტოს ქოიარ ამილახორიშვილმა ოსმალებს ორი ციხე გადასცა. 7 აგვისტოს ოსმალებმა მგელციხის წარუმატებელი იერიში დაიწყეს, ხოლო 8 აგვისტოს ქაჯის ციხე, ველის ციხე და თეთრციხე აიღეს. 9 აგვისტოს გაიმართა ჩილდირის ცნობილი ბრძოლა. 10 აგვისტოს მანუჩარი ქაჯის ციხეს ოსმალთა გარნიზონს „შეეყარა“. ამის შემდეგ ის და არფაქსადი მიდიან ოსმალებთან. 17 აგვისტოს კი მანუჩარი ოსმალებს თმოგვის ციხეს გადასცემს. მართებულია ქ.შარაშიძის შენიშვნა, რომ 7-8 აგვისტოს ბრძოლების დროს მანუჩარი არ ჩანს. მაგრამ ამ ბრძოლებში არც სხვა ვინმე ჩანს. არც ჯაყელთაგან და არც მათ მოწინააღმდეგეთაგან. ბრძოლას მხოლოდ ციხის გარნიზონები აწარმოებენ.

ლალა-ფაშა არტაანში 5 აგვისტოს ჩავიდა. ჩვენ არ ვიცით სად იყო ამ დროს მანუჩარი. დავეუშვათ ახალციხეში. როდის შეიტყობდნენ ამ ამბავს ჯაყელები? ყველაზე კარგ შემთხვევაში მეორე დღეს 6 აგვისტოს. ცხადია მანუჩარს არ ეცოდინებოდა ლალა-ფაშას გეგმები. ამიტომ ის წინასწარ (პრევენციის სახით) ვერაფერს დაგეგმავდა. მას მხოლოდ რეაგირების გაკეთება შეეძლო ოსმალთა სარდლის ქმედებებზე. თუნდაც ვივარაუდოთ, რომ მან მოწინააღმდეგის გეგმა მგელციხეზე შეტევა გამოიცნო, ის ახალციხიდან დაიძრებოდა 7 აგვისტოს. ანუ იმ დღეს როდესაც ოსმალებმა მგელციხეს შეუტიეს. რეალურად კი მანუჩარს მგელციხისკენ მოძრაობა შეიძლება დაეწყო მხოლოდ მას შემდეგ რაც ამ ციხესთან დაწყებული ბრძოლის ამბავს გაიგებდა.

ლალა-ფაშა არტაანიდან ჩილდირის მიმართულებით დაიძრა. ველის ციხე, ქაჯის ციხე და თეთრციხე ოსმალთა ჯარის მოძრაობის არეალში მოექცნენ. მგელციხე ოსმალთა მარშრუტში არ ხვდებოდა, ის უფრო ჩრდილოეთითაა მტკვრის ხეობაში. სავარაუდოდ მის ასაღებად ლალა-ფაშა საგანგებო რაზმს გაგზავნიდა, მაშინ როცა გზაზე მყოფი ველის ციხის, ქაჯის ციხისა და თეთრციხის აღება ძირითად ლაშქრს მოუწევდა (მანძილი არტაანიდან ჩილდირამდე ოსმალებს თავისუფლად შეეძლოთ ერთ დღეში გაევიდნენ. სავარაუდოდ, ციხეების ასაღებად ლალა-ფაშა გარკვეულ ძალას ტოვებდა და დანარჩენი ლაშქარი გზას აგრძელებდა). მგელციხე ჯაყელთა ერთ-ერთი უმთავრესი დასაყრდენი იყო. მისი აღების მცდელობა, ოსმალთა მხრიდან ჯაყელებთან დადებული შეთანხმების დარღვევად შეიძლება ჩავთვალოთ. ამიტომ თავის მხრივ მანუჩარსაც შეეძლო შეთანხმება გაუქმებულად ჩათვალა და ბრძოლა დაეწყო, მაგრამ ასე არ გააკეთა.

მგელციხისათვის ბრძოლა ხუთშაბათს 7 აგვისტოს დაიწყო და სამშაბათამდე ანუ 12 აგვისტომდე გაგრძელდა. ცხადია მანუჩარს თავისუფლად შეეძლო ამ ბრძოლისთვის მიესწრო, მაგრამ არ მივიდა. რაც შეეხება ოსმალთა მიერ 8 აგვისტოს დაკავებულ ციხეებს, თუ მანუჩარი ახალციხიდან 7 აგვისტოს დაიძრა, შეიძლება ამ ციხეებისათვის წარმოებული ბრძოლისთვის ვერც მიესწრო.

შეიძლება გვეფიქრა, მანუჩარ ჯაყელი იმიტომ არ ჩანს 7-8 აგვისტოს ბრძოლებში, რომ უბრალოდ ვერ მოასწრო ბრძოლების ადგილზე მისვლა. თუმცა მგელციხესთან მისი მიუსვლელობა უფრო სხვა რამეს გვაგვარაუდებინებს. მანუჩარი ოსმალებთან პირდაპირ შეტაკებას გაურბოდა (არ სურდა თავიდანვე დაპირისპირება და ომის დაწყება) და დროს „ჭიმავდა“. ელოდებოდა რა მოხდებოდა. სურვილის შემთხვევაში შეიძლება მისი ეს გადაწყვეტილება გარკვეულწილად ღალატად ჩავთვალოთ. ოსმალებთან ბრძოლის გამართვა ძალიან პატრიოტული და თავდადებული საქციელი იქნებოდა, მაგრამ რამდენად რაციონალური? მანუჩარის პოზიცია ციხე-სიმაგრეების დამცველთა გაწირვას ნიშნავდა, ეს ცხადია. მართალია ზოგი ციხე მის მოწინააღმდეგეებს ეკუთვნოდა და ჯაყელს შესაძლოა მისი გარნიზონის ბედი არც ადევნებდა. პირიქით, მოხარულიც კი იქნებოდა თუ ვთქვათ შალიკაშვილების კუთვნილი ქაჯის ციხე დაეცემოდა. თუმცა ნაწილი ციხეებისა ჯაყელების კუთვნილებას წარმოადგენდა (მგელციხე ჯაყელების ერთ-ერთი მთავარი ციტადელი იყო). მანუჩარის პოზიცია ალბათ მცირეს გაწირვით უფრო მნიშვნელოვანის გადარჩენა იყო.

ჩილდირის ბრძოლის შემდეგ კი ყველაფერი გაირკვა და მანუჩარიც ლალა-ფაშასთან გამოცხადდა.

რთულია პასუხის გაცემა კითხვაზე, რა უნდოდა მანუჩარს 10 აგვისტოს ქაჯის ციხესთან? მნელი დასაშვებია, რომ ოსმალთა მიერ ამ ციხის დაკავების ამბავი არ ცოდნოდა.

სწორედ ამის შემდეგ მიდიან არფაქსადი და მანუჩარი ოსმალებთან. ქ.შარაშიძე აქცენტს აკეთებს სიტყვებზე - „არფაქსად . . . პატრონს მანუჩარს თან მიჰყუა“ და თვლის, რომ მისვლის ინიციატორი ჯაყელი იყო. მატთანეში პირდაპირ წერია, „არფაქსად ჰბირებოდა ექუსით ციხითა მას წინათ და ხერთვისი და ხუთი ციხე მას შეეძღუნა.“ მემატთანეს სიტყვები შეიძლება ასეც გავიგოთ, რომ მანუჩარს თავისი საქმე ქონდა ოსმალებთან, არფაქსადმა კი გამოიყენა მანუჩარის კავშირი ლალა-ფაშასთან და მას გაყვა.

ლალა მუსტფა ფაშასა და ჯაყელებ შორის მოლაპარაკების შედეგად ამ უკანასკნელებს ებოძათ: „ქაიხოსროს შვილთაგან ზემოხსენებულ მელიქ მანუჩარს - აწყურის სანჯაყი, მის ძმას მელიქ ყვარყვარეს ძველთაგანვე მისი დაბადების ადგილი - ოლთისის სანჯაყი და სხვა მის ძმებს - დიდი ზეამეთები და მათ დედას ზემოაღნიშნულ დედისიმედს - სამი სოფელი სახასო მამული“.<sup>29</sup> აღსანიშნავია, რომ „ოსმალეთის მთავრობა საერთოდ მიღებულ წესს არღვევდა, როდესაც ათაბაგის სახლის წევრებს ქრისტიანობით და არა მაჰმადიანობით უმტკიცებდა მიწის ნაკვეთს, რაც მეტად იშვიათი მოვლენა იყო ოსმალეთში“.<sup>30</sup>

<sup>29</sup> სვანიძე გვ. 111

<sup>30</sup> სვანიძე გვ. 111

ლალა მუსტაფა ფაშასა და ჯაყელების ურთიერთობის შესახებ საინტერესო ცნობაა დაცული ოსმალთა ისტორიკოსისი მუნეჯიმ-ბაშის თხზულებაში. „საქართველოს მეფე ქალმა, დედისიმედად წოდებულმა, თავისი შვილი მანუჩარი ექვსათასიანი ქართველთა ჯარით და რამდენიმე აზნაურით გაგზავნა და უბრძანა - რომელი მხარეც გამარჯვებული გამოვა, იმ მხარეს დამორჩილდითო. როდესაც მანუჩარმა დაინახა, რომ ისლამის ჯარია გამარჯვებული, მივიდა და მათ მორჩილება მოახსენა. სარდალმა მას პატივი სცა, საპატიო ხალათი ჩააცვა, ყიზილბაშთაგან აღებული დოლი და დროშები უბოძა. შემდეგ არტაანის ბეგი აბდარ-რაჰმანი გაგზავნა და აიღო და დაიპყრო ჩილდირის, თმოგვის, ხერთვისისა და ახალქალაქის ციხეები. ზემოხსენებული მანუჩარი საქართველოს მეფეების დიდებულთა ჩამომავალი იყო. მამამისი ქაიხოსრო რომ გარდაიცვალა, ის და მისი ძმა ყვარყვარე პატარები დარჩნენ. მათმა დედამ დედისიმედმა ქვეყნის საქმეების მოწესრიგება დაიწყო. იგი ალთუნ ყალას<sup>31</sup> ფადიშაჰის სახელწოდებით იყო ცნობილი. მანუჩარი თავის ძმა ყვარყვარესთან ერთად სარდლის უდიდებულესობის წინაშე მივიდა. როდესაც დიდებული ისლამის მიღებით იქნენ გაპატიოსნებული, დიდი გულკეთილობითა და უდიდესი პატივისცემით მიიღეს. მანუჩარს მუსტაფა ეწოდა და მის ძმას ყვარყვარეს კი ისლამის სახელებიდან ერთ-ერთი სახელი დაერქვა. მუსტაფას აწყურის სანჯაყი და მის ძმას ოლთის სანჯაყი ებოძა. მათ დედას სამი ციხე ხასად დაენიშნა. სხვა ტერიტორიები დაპყრობილ იქნა.“<sup>32</sup> მუნეჯიმ-ბაშის უზუსტობა მოსდის. მანუჩარი ცოტა გვიან, სტამბულში გამაჰმადიანდა. ყვარყვარეს კი ისლამი არ მიუღია, ეგებ ამიტომაცაა, რომ ოსმალთა მემკვიდრეებმა მის გამუსლიმების შემდგომ სახელს არ ასახელებს.

ისტორიკოსის ცნობა თავისთავად საინტერესოა, მაგრამ ჩვენ გვინდა ყურადღება ერთ დეტალზე გავამახვილოთ. დედისიმედი მანუჩარს ავალებს ჩილდირის ბრძოლისათვის თვალყურის დევნებას და შემდეგ სათანადო გადაწყვეტილების მიღებას და არა ყვარყვარეს. მიხედვად იმისა, რომ ყვარყვარე უფროსი ძმაა და ათაბაგის წოდებაც მას ქონდა. ჩვენი აზრით, ეს კიდევ ერთი არაპირდაპირი მინიშნებაა, რომ მანუჩარია რეალურად მთავარი პოლიტიკური ფიგურა და არა მისი უფროსი ძმა.

ისკანდერ მუნშის თანახმად, „ლალა ფაშა ... ახალციხის ველაიეთში მოვიდა, რომელიც საქართველოს ეკუთვნოდა, სიმონ-ხანის სიძის მანუჩარ-ხანის საგამგეო ოლქი იყო და ამ მხარის (ირანის) საზღვრებში შემოდიოდა. მან (მანუჩარმა) ოსმალთა მორჩილებისაგან თავი შორს დაიჭირა და წინააღმდეგობის გზას დაადგა. თავისი ციხე გაამაგრა და თვითონ კი სიმონ-ხანთან მივიდა. ლალა

<sup>31</sup> ოქროსციხის თურქული სახელწოდება

<sup>32</sup> ნ. შენგელია, ოსმალთა ისტორიკოსისი მუნეჯიმ-ბაშის ცნობები ლალა მუსტაფა ფაშას ამიერკავკასიის ქვეყნებში ლაშქრობის შესახებ. ქართული წყაროთმცოდნეობა II. 1968 წ. თბ. გვ. 122

ფაშამ მისი ციხე გარემოიცვა, ზარბაზნები მიუმარჯვა და ბრძოლა-ჭიდილით დაიმორჩილა. მერე შიგ მცველები და იანიჩრები დასტოვა და სიმონ-ხანის ქვეყნისკენ გამოემართა ... ჩილდირის ომში ყიზილბაშთა დამარცხების შემდეგ ლალა ფაშამ ახალციხის ციხე იმავე ორ-სამ დღეში დაიპყრო, შიგ სანოვაგე და ლაშქარი დასტოვა და ამ გზით სიმონ-ხანის ქვეყნისკენ გაემართა“.<sup>33</sup> ირანელი ისტორიკოსი რამდენიმე შეცდომას უშვებს ამ პატარა ფრაგმენტში. სავარაუდოდ მას სხვადასხვა დროს მომხდარი ფაქტები მექანიკურად აქვს გაერთიანებული. საინტერესოა ლალა ფაშას მიერ ახალციხის დაკავების ფაქტი. ქართული წყაროები ამის შესახებ დუმან.

საათაბაგოს საკითხის გადაწყვეტის შემდეგ ოსმალთა ჯარი თბილისისკენ დაიძრა და 24 აგვისტოს ქალაქი აიღო. ამის შემდეგ კი შაქი-შირვანისკენ გაემართა. სართიჭალასთან ლალა მუსტაფა ფაშას ალექსანდრე კახთა მეფე მიეგება და მორჩილება გამოუცხადა. მალე ოსმალთა ჯარმა შირვანიც დაიკავა.<sup>34</sup>

## ნაწილი 2

1578 წელს შირვანის დამორჩილების შემდეგ უკან გამობრუნებულმა ოსმალთა სარდალმა ლალა მუსტაფა ფაშამ კვლავ სამცხეზე გაიარა და ყვარყვარესა და მანუჩარს სტამბულში წასვლა „შესთავაზა“.<sup>35</sup>

„პატრონი ყუარყუარე წინ მიეგებად თუითან ლალა-ფაშაც მოვიდა და გაღმა ლეკზე დადგა. ხუთშაბათს პატრონი დედისიმედი გავიდა ციხიდან და ლალაფაშა ნახა. ანგარიში არ იქნებოდა, რაც ლაშქრისა და აქლემების ჯარი იყო. შაბათს, ცისკრისა აიყარა და წავიდა. პატრონი ყუარყუარე თან გაჰყუა მოტყუებით და აღარ დაბრუნდა. პატრონი მანუჩარიც თან წაჰყუა. სამშაბათს დღეს ამბავი მოვიდა პატრონი ყუარყუარე აღარ დაბრუნდაო . . . პატრონი მანუჩარი მოვიდა, აწყუჭრს მობრუნდა.“<sup>36</sup> მკვლევართა ნაწილი თვლის, რომ „ყვარყვარე ათაბაგს სხვა პოლიტიკური გეზი აქვს და მის მომდევნო ძმას - მანუჩარს სხვა. მანუჩარი თავისი ნებით მისდევს ლალა-ფაშას, ყვარყვარე კი თვითონ ლალა-ფაშამ გაიტყუა“.<sup>37</sup> ჩვენი აზრით, განსხვავებული პოლიტიკური ორიენტაცია მთავარი არაა. მანუჩარია ლალა ფაშას რეალური მოკავშირე და ამიტომ ექცევა მას განსხვავებულად ოსმალთა სარდალი. მანუჩარი ოსმალთა სამხედრო ოპერაციებშიც იღებს მონაწილეობას. „ლალაფაშას ლაშქარი

<sup>33</sup> ვ.ფუთურიძე, ისქანდერ მუნშის ცნობები საქართველოს შესახებ 1969 წ. თბ. გვ. 29

<sup>34</sup> ნარკვევები გვ. 128-129

<sup>35</sup> სვანიძე გვ. 126

<sup>36</sup> შარაშიძე გვ. 51

<sup>37</sup> შარაშიძე გვ. 51 სქოლიო 2

და მირძა-ალი გამოეგზავნა პატრონს მანუქართანა, ქართლს გაეძახა. ქართლს ვერ ჩაუვიდეს, სადგერს დადგეს და ამოსწყუიდეს სადგერი. წმიდის გიორგის განძი წახდა. მეორედ კიდევ სანჯახები გამოეგზავნა. შეიყარა პატრონი მანუქარ და ზემო ქართლი დაარბია.“<sup>38</sup>

რა თქმა უნდა ეს საერთო ქართული საქმის საწინააღმდეგო ნაბიჯი იყო, მაგრამ იმ დროს ყველა მეფე-მთავარი ძირითადად საკუთარი სამფლობელოს კეთილდღეობაზე ზრუნავდა. ოსმალთა მოკავშირეობით მანუქარი მესხეთის ნაწილის გადარჩენას ცდილობდა.

საბოლოოდ მანუქარსაც მოუწია სტამბულში წასვლა. „ქორონიკონსა სძზ (1579 წელი) მარტს კვ (23) პატრონი მანუქარ არზრუმს წავიდა. პატრონი ყუარყუარე და პატრონი მანუქარ კონსტანტინოპოლის წავიდეს აზრუმიდამა. აპრილის კ (20) გადგეს“<sup>39</sup>

სტამბულში მყოფი ევროპელი დიპლომატების ცნობების თანახმად, „1579 წლის 3 ივნისს კონსტანტინოპოლში ჩამოვიდა ორი ქართველი თავადი, დაახლოებით 150 კაცის თანხლებით ... მათ შესახვედრად სკუტარში (სტამბოლის აზიური ნაწილი) ორი გალერა გაგზავნეს, რაც საგანგებო პატივისცემის ნიშანი იყო. ასეთი პატივი ამ ქვეყნიდან ჩამოსული არცერთი ელჩისთვის არ უციათო. მანუქარისა და ყვარყვარეს შესახვედრად მოსულან საბერძნეთის (რუმელიის ბეგლარბეგი), რაგუზის, ვალაჰეთისა და მოლდავეთის ელჩები.“<sup>40</sup>

9 ივნისს ჯაყელები სულთანმა მიიღო. „ორივე ძმამ, საკმაო დრო დაჰყვეს სასახლეში, მაგრამ მათი სურვილი შეუწყნარებლად იყო დატოვებული და მათ გამოუცხადეს, რომ სულთანს გადაწყვეტილი აქვს, საბოლოოდ ჩამოაყალიბოს სანჯაყი მათ ქვეყანაში, ან დანიშნოს იქ ქვეყნის მმართველი“.<sup>41</sup>

თომაზო მინადლის თუ ვენდობით, უფროსი ძმა (რომელსაც მინადლი შეცდომით ალექსანდრეს უწოდებს) მშვიდად ელოდა მისთვის სათანადო პატივის ზომებს. მაგრამ მანუქარი ყოველნაირად ცდილობდა პირველობის მოპოვებას. მან „გადაწყვიტა მიემართა ყველაფრისთვის, ოღონდ უბრალო ჯარისკაცად არ დარჩენილიყო, ნურც მიხედავს ძმის პირმშობას, გამოსტაცოს მემკვიდრეობა. მშობლიური სარწმუნოების დაკარგვის ფასად მიაღწიოს ხრწნად და ამაო სიმდიდრეს, მაგრამ არამც და არამც არ დაუთმოს ძმას ღირსებაში ... შეიძლება სწორად ფიქრობენ ზოგიერთნი, რომ მას მუსტაფასთან საიდუმლო შეგონება ჰქონდა ძმის საზიანოდ და დასაღუპად“.<sup>42</sup> ძმებს შორის არსებულ შესაძლო დაპირისპირებაზე უკვე ვისაუბრეთ. არა გვგონია, რომ მას შემდეგ რაც მუსტაფა ლალა

<sup>38</sup> შარშიძე გვ. 51

<sup>39</sup> შარშიძე გვ. 52

<sup>40</sup> სვანიძე გვ. 127

<sup>41</sup> სვანიძე გვ. 130

<sup>42</sup> თომაზო მინადლი გვ. 66-67

ფაშამ მანუჩართან დაამყარა ურთიერთობა და ის გაიხადა მოკავშირედ, ყვარყვარეს რეალურად ქონოდა პირველობის იმედი.

სულთანმა ძმებს ისლამის მიღება მოსთხოვა. ყვარყვარემ უარი განაცხადა, მანუჩარი კი დათანხმდა. უნდა დავეთანხმოთ მოსაზრებას, რომ მანუჩარი „როგორც ჩანს, უფრო შორსმჭვრეტელი პოლიტიკოსი იყო. ის დარწმუნდა, რომ ამ ვითარებაში წინააღმდეგობის გაწევა უაზრობა იყო. მანუჩარმა დროებით უკან დაიხია, მიიღო სულთნის წინადადება, გამაჰმადიანდა და სულთანმა იგი ბეგლარბეგად დანიშნა“.<sup>43</sup>

„მანუჩარს შეუსრულეს წინადაცვეთა, მიიღო სახელი მუსტაფა ფაშის ტიტული და ალთუნყალის გუბერნატორობა და ყველა მამული დედისა და ძმისა.“<sup>44</sup>

1579 წლის 25 ივნისს სულთან მურად III-ის ბრძანებით მესხეთის დაპყრობილ ტერიტორიაზე ჩილდირის ანუ ახალციხის საფაშო შეიქმნა. ფაშად მუსტაფა (გამაჰმადიანებული მანუჩარი) დაინიშნა.<sup>45</sup>

სულთნის მიერ ფაშად დანიშნული მუსტაფა (მანუჩარი) მალევე დაბრუნდა სამცხეში. „პატრონი მანუჩარ მოვიდა კოსტანტინოპოლიდამ. ფაშობად ებოძა ხუანთქარსა და სრულად მისი მამული . . . ქორონიკონსა სდთ (1581 წელი) პატრონმან მანუჩარ გვირგვინი იკურთხა ფეხერვალს.“<sup>46</sup> ამ ცნობასთან დაკავშირებით ქ.შარაშიძე შენიშნავს, „გასარკვევია, რა მნიშვნელობით არის ნახმარი აქ გვირგვინის კურთხევა. ექვთიმე თაყაიშვილის მიხედვით - ათაბაგად. თუ ეს ასეა, მაშინ გამოდის, რომ მანუჩარი უფროსი ძმის ყვარყვარე ათაბაგის სიცოცხლეში კურთხეულა ათაბაგად, რაც ძნელი წარმოსადგენია. გვირგვინის კურთხევა აქ დაქორწინებად უნდა გავიგოთ“.<sup>47</sup>

შესაძლოა გვირგვინის კურთხევის ქვეშ მანუჩარის დაქორწინება გვეგულისხმება, მაგრამ ამ დროს მას ისლამი აქვს მიღებული. მანუჩარი ხელახლა მხოლოდ 1582 წელს გაქრისტიანდა. ჩვენი აზრით საეჭვოა, რომ ამ შემთხვევაში ქორწინება იგულისხმებოდეს.

ყვარყვარე ჯაყელი 1581 წელს გარდაიცვალა. „ქორონიკონსა სდთ გიორგობისთუჭსა კე (25) პატრონის ყუარყუარეს და პატრონის არჩილისგან ღმერთი გარისხდა“.<sup>48</sup> ქ.შარაშიძე შენიშნავს, რომ ყვარყვარესა და არჩილის გარდაცვალების მიზეზად ან „მსვრელი სენი უნდა ვიგულისხმოთ, ან ბრძლის ველზე დაღუპვა“<sup>49</sup>. ჩვენს ხელთ არსებული წყაროების მიხედვით, ამ დროს, ანუ 1581 წელს

<sup>43</sup> სვანიძე გვ. 130

<sup>44</sup> თომაზო მინაძლი გვ. 68

<sup>45</sup> ნარკვევები გვ. 131

<sup>46</sup> შარაშიძე გვ. 53

<sup>47</sup> შარაშიძე გვ. 53 სქოლიო 8

<sup>48</sup> შარაშიძე გვ. 54

<sup>49</sup> შარაშიძე გვ. 54

სამცხეში ბრძოლები არ მიმდინარეობს. თანაც როგორც აღვნიშნეთ ყვარყვარე, განსხვავებით მანუჩარისგან, ნაკლებად მონაწილეობდა სამხედრო ოპერაციებში. ჩვენი აზრით, გარდაცვალების მიზეზი ავადმყოფობა უნდა ყოფილიყო.

„მესხური მატიაწეს“ მიხედვით 1581 წლის თებერვალში მანუჩარმა „გვირგვინი იკურთხა“, ხოლო ნოემბერში ყვარყვარე გარდაიცვალა. ეგებ ზამთარში ყვარყვარე შეუძლოდ შეიქმნა და ათაბაგობა მის ძმას გადაეცა. ცალკე საკითხია რა ბედი ეწია ათაბაგის ტიტულს მას შემდეგ რაც ჩილდირის საფაშო შეიქმნა. ათაბაგობის ბოძება თუ ჩამორთმევა სავარაუდოდ სულთნის ხელში არ იყო და ალბათ არც აინტერესებდა. მანუჩარის ფაშად დანიშვნის შემდეგ ყვარყვარე კვლავ შეინარჩუნებდა ათაბაგის ტიტულს. ათაბაგობა რეალურად ალბათ უკვე მხოლოდ გვარის უფროსობასდა ნიშნავდა. ასეთ შემთხვევაში სრულიად დასაშვები ჩვენს მიერ გამოთქმული მოსაზრება, რომ 1581 წლის თებერვალში უფროსი ძმის ავადმყოფობის გამო ათაბაგობა და გვარის მეთაურობა მანუჩარს გადაეცა.

ქართლის მეფე სვიმონის დამორჩილების მიზნით, 1582 წელს ჰადიმ მეჰმედ ფაშა ოციათასიანი ლაშქრით არზრუმიდან საქართველოსკენ გამოემართა. ოსმალები ჯერ ახალციხეში მივიდნენ, სადაც მათ მანუჩარ (მუსტაფა) ჯაყელი შეუერთდათ. „მუსტაფამ განაცხადა, რომ მისი აზრით მის სამფლობელოზე გზა ყველაზე ადვილი, უმოკლესი და უშიშარია. მაჰმადმა (იგულსხმება ჰადიმ მეჰმედ ფაშა - მ.ბ.) მისი რჩევა მიიღო და მეგზურად ის აირჩია. ყველაფერში მის რჩევას მიენდო.“<sup>50</sup> მანუჩარის რჩევით ოსმალები ბორჯომის ხეობის გავლით თბილისისკენ დაიძრნენ.<sup>51</sup> მუხრანთან სვიმონ I-მა ოსმალები სასტიკად დაამარცხა და მეჰმედ ფაშა უკან სამცხეში დაბრუნდა. სწორედ აქ სცადა მან მანუჩარის მოკვლა, მაგრამ როგორც ზევით აღვნიშნეთ არაფერი გამოუვიდა. „პატრონს მანუჩარს უღალატეს ურუმთა. პატრონი მორჩა. ორნივ ფაშა მძიმედ დაიკოდნეს და გაიქცეს და თემი ჩუენუე დაგურჩა.“<sup>52</sup>

1582 წელს სამცხეში მანუჩარ ჯაყელმა ოსმალების წინააღმდეგ აჯანყება დაიწყო და სვიმონ მეფესაც დაუკავშირდა. საინტერესოა თომაზო მინადლის მონათხრობი, რომ ჰადიმ ფაშას კარავში მომხდარი ამბის შემდეგ „მუსტაფამ გაუგზავნა სულთანს პატაკი მის თავზე მომხდარი ყველა ამბის შესახებ, ჩიოდა რა უსაფუძვლო ეჭვებზე რომელიც შეურაცხოფას აყენებდა მას და იმდენი წერა ისე ფარავდა თავის გრძნობებს, ისე შტრიხავდა სიმართლეს მონაგონებითა და მონაჭორებით, რომ

<sup>50</sup> თომაზო მინადლი გვ. 115

<sup>51</sup> ნარკვევები გვ. 134

<sup>52</sup> შარაშიძე გვ. 54



დაკმაყოფილებულმა სულთანმა საჩუქრად ფარი და ტანისამოსიც კი გამოუგზავნა.<sup>53</sup> გამორიცხული არ არის, რომ დროის მოგების და მოწინააღმდეგს შეცდომაზე შეყვანის მიზნით მანუჩარმა მართლაც მისწერა რამდენიმე წერილი სულტანს. ეს მის

ქართულ ისტორიოგრაფიაში გამოთქმულია მოსაზრება, რომ 1582 წელს, აჯანყების შემდეგ მანუჩარმა სამცხეში ათაბაგობა აღადგინა, ხოლო თავად ისლამი უარყო და კვლავ გაქრისტიანდა.<sup>54</sup> მანუჩარის გაქრისტიანებას ადასტურებს ოსმალური წყაროც, „მუსტაფა ფაშა - მანუჩარ - ქართველი, როცა ლალა მუსტაფა ფაშა ირანთან ომის დროს ლაშქრის სარდალი იყო, მანუჩარი მის წინაშე გამაჰმადიანდა და მას ებოძა ბეგლარბეგის თანამდებობა. 990 წელს (1582 წელი) დაგვიფაროს ალაჰმა, ისევ ქრისტიანობაში მოექცა. სურსათ-სანოვანის ადალის ხელმძღვანელები ხადიმ მეჰმედი და ბოსნიელი მეჰმედ ფაშები კარავში დაჭრა და გაიქცა. ტყუილ-უბრალოდ დაკარგა სააქაოც და საიქიოც და დაიღუპა.“<sup>55</sup> სწორედ ამის შემდეგ მოიყვანა მანუჩარმა ცოლად სვიმონ მეფის ქალიშვილი.

რაც შეეხება ცოლის შერთვას, ქართველი მემკვიდრის მიხედვით, „ქორონიკონსა ს სამოცდათერთმეტსა (1583 წელი 1312+200+71), მარტს კდ (24) ბზობაჲსა პატრონი მანუჩარ მეფეთ-მეფის პატრონის სჷმეონის ქალი, პატრონი ელენე მოიყვანა.“<sup>56</sup>

ათაბაგობა კი მანუჩარს, როგორც უკვე აღვნიშნეთ, 1581 წელს უნდა მიეღო.

აჯანყებული ჯაყელის წინააღმდეგ ბრძოლა პირველ ეტაპზე ჩილდირის ახალ გამგებელს, იუსუფ ფაშას (გამაჰმადიანებული იმერელი ბაგრატიონი) დაევალა. მას დამხმარე ძალები არზრუმიდანაც გაეგზავნა.<sup>57</sup> თუმცა მანუჩარმა ახალციხის გათავისუფლება მაინც მოახერხა. მიუხედავად ამ წარმატებისა, ჯაყელი ხვდებოდა რომ საბოლოო გამარჯვება ძნელი იქნებოდა და სულთნის კართან მოლაპარაკებები დაიწყო. ირანთან მიმდინარე ომის პირობებში სულთნისთვის დამატებითი პრობლემა, მანუჩარის აჯანყების სახით, ცხადია სასურველი არ იყო. ამიტომ ჯაყელის შემორიგება სულთანსაც აწყობდა.

„1583 წელს მუსტაფა ფაშამ გაგზავნა სტამბულში თავისი კაცი ბოდინის მოსახდელად, იმის გამო, რომ მან არ იცოდა არაფერი მისადმი მიმართული ცილისწამების შესახებ. ეს მისი კაცი აღნიშნულ თვეს უკან დაბრუნდა გამამხნეველი და ნუგეშის მომცემი ბრძანებით. ჩილდირი მას ებოძა, ხოლო იუსუფ ფაშამ მიიღო ყარსის ბეგლარბეგობა“<sup>58</sup>.

<sup>53</sup> თომაზო მინადლი გვ. 124

<sup>54</sup> სვანიძე გვ. 155

<sup>55</sup> ჯიქია გვ. 114

<sup>56</sup> შარაშიძე გვ. 54

<sup>57</sup> სვანიძე გვ. 154

<sup>58</sup> სვანიძე გვ. 155

მანუჩარის ჩილდირის საფაშოს მმართველად დანიშვნა სულთნის მხრიდან დათმობა იყო. თავი რომ დავანებოთ იმას, რომ მანამდე ჩადენილის გამო პასუხი არ მოთხოვეს. რაღაცა სახის დათმობაზე წასვლა მანუჩარსაც მოუწევდა. თუმცა ჩვენთვის უცნობია კონკრეტულად რაში გამოიხატა ეს.

„ოსმალური წყაროებიდან ირკვევა, რომ მანუჩარი, ჩილდირის ბეგლარბეგად დანიშვნის შემდეგაც, სიმონ მეფესთან ერთად კვლავ თავს დაესხა თბილისში მიმავალ ოსმალთა ლაშქარს და მას დიდი ზარალი მიაყენა“.<sup>59</sup> საინტერესოა, რამდენად შესაძლებელი იყო 1583 წელს ქრისტიანი მანუჩარის ბეგლარბეგად დანიშვნა. ჩვენი აზრით, ეს ნაკლებად სავარაუდოა. შესაძლოა მანუჩარი, ოსმალთა ვასალობის პირობით, ათაბაგის ტიტულით დაინიშნა სამცხის მმართველად. სულთნის კარი კი რეალურად მას თავის მოხელედ განიხილავდა და ოსმალურ წყაროებშიც მათივე სამოხელეო ტიტულით - ბეგლარბეგი - ამიტომ მოიხსენიება.

სავარაუდოდ მანუჩარი მალევე დარწმუნდა, რომ ოსმალები თავის რეალურ პოლიტიკას არ ცვლიდნენ. მიხვდა, მისი დანიშვნა დროებითი იყო, ასეთი გზით ვერაფერს მიაღწევდა და ბრძოლის გარდა სხვა გამოსავალი აღარ იყო.

მესხების ბრძოლა ოსმალთა დამპყრობლების წინააღმდეგ ირანელების ინტერესებშიც შედიოდა. ამიტომ მანუჩარი მართებულად მოიქცა როდესაც შაჰს დაუკავშირდა. საპასუხო ნაბიჯი - „პატრონს მანუჩარს ჩალაბუთი მოსცა და პატრონს დედისიმედს ხუთი დიდი სოფელი“<sup>60</sup> - მხოლოდ მორალურ მხარდაჭერად შეგვიძლია განვიხილოთ. ირანიდან რეალური დახმარება არ ჩანდა. მიუხედავად ამისა მანუჩარის ანტიოსმალური აჯანყება სულთანს მნიშვნელოვან პრობლემებს უქმნიდა. ამ მხრივ საინტერესოა თომაზო მინადლის ცნობა, რომ „მთავარსარდალმა ფერჰად ფაშამ მიიღო მითითება იმის შესახებ, რომ თუ მან აშკარა წინააღმდეგობების გაწევა არ დაიწყო, უყურადღებოდ დატოვოს მისი უკანასკნელი მოქმედება“.<sup>61</sup> სწორია თვალსაზრისი, რომ „უკანასკნელი მოქმედება“ აჯანყებას გულისხმობს.

1584 წელს ფერჰად ფაშამ მაინც სცადა მანუჩარის დამარცხება. „ფერადმა დაიფიცა, რომ არზრუმში არ დაბრუნდებოდა, სანამ არ გაივლის ცეცხლითა და მახვილით მანუჩარის ყველა სამფლობელოს“.<sup>62</sup> ოსმალები ჯერ ჯავახეთში მივიდნენ. ახალქალაქის მოსახლეობა მთაში გაიხიზნა. ფაშამ ქალაქი დაიკავა, იქ ოთხი დღე დარჩა და შემდეგ ახალციხისკენ დაიძრა. მოსახლეობა აქედანაც გახიზნული იყო და ოსმალებს ცარიელი ქალაქი დახვდათ. ფერჰად ფაშას სურვილი ჰქონდა

<sup>59</sup> სვანიძე გვ. 156

<sup>60</sup> შარაშიძე გვ. 54

<sup>61</sup> სვანიძე გვ. 156

<sup>62</sup> თომაზო მინადლი გვ. 145

ახალქალაქი გაემაგრებინა და იქ გარნიზონი დაეტოვებინა, მაგრამ მესხების მუდმივი თავდასხმებისა და საკუთარ ჯარში დაწყებული უკმაყოფილების გამო განზრახვა ვერ აღასრულა.<sup>63</sup> „ქორონიკონსა სიობ (1584 წელი 1312+200+10+60+2) სარდარი ვარად-ფაშა მოვიდა ახალციხეს საშენებლად. ველარ დადგა, წავიდა და თემი ჩუენვე დაგურჩა“<sup>64</sup>. „ურჯულო ქართველები, რომლებიც მანუჩარს ემორჩილებოდნენ, გზაზე დახვდნენ და მუსლიმანთა ქონებას დიდი ზარალი მიაყენეს. ქართველებმა თვით ფერჰად ფაშას კუთვნილი პირადი ურემი გამარცხეს და მის პირად ნივთებთან: მურასა ხმალთან, მუზარადთან, ფართან, სიასამურთან და ფოცხვერის ტყავებთან ერთად, რომელიც ურემზე ეწყო, ფერჰად ფაშას საყვარელი მხევალი ქალიც მოიტაცეს.“<sup>65</sup>

1585 წელს თავრიზის აღების შემდეგ, ოზდემირ ოღლუ ოსმან ფაშამ მანუჩარის წინააღმდეგ ჯარი გაგზავნა. „ოსმალური წყაროების მიხედვით, მანუჩარი ოსმალებთან ბრძოლაში დამარცხდა, მაგრამ, საფიქრებელია, რომ ეს ცნობა გაზვიადებული უნდა იყოს, რადგან ამ ბრძოლას არავითარი რეალური შედეგი არ მოჰყოლია.“<sup>66</sup> შესაძლოა მანუჩარმა ერთი ბრძოლა მართლაც წააგო, მაგრამ მისი სრული დამარცხებისათვის ოსმალთა სარდალს ძალა აღარ ეყო.

მანუჩარ ჯაყელი ცხადია ხვდებოდა, რომ ხანგრძლივ ბრძოლაში გამარჯვების შანსი არ ქონდა. მანუჩარმა სტამბულში ელჩი გაგზავნა. „მაწყურელი გაგზავნეს კოსტანტიპოლეს და საპატიონი მძევალად: შალიკაშვილი ედიშერ, შალიკაშვილი ელია და ამილახორიშვილი ქოიარ. და მძევლები დაიჭირეს. პატრონი მანუჩარ ველარ ენდო.“<sup>67</sup>

სულთანმა მანუჩარს აღარც ენდობოდა და რა რაც მთავარია ჯაყელი აღარაფერში ჭირდებოდა.

1587 წელს „ბრწყინვალე პორტამ“ სვიმონ მეფისა და მანუჩარ ჯაყელის წინააღმდეგ ახალი დიდი ჯარი გამოგზავნა. ჩილდირის ახალ ფაშას მანუჩარის დამარცხება დაევალა. ჯაყელის წინააღმდეგ ბრძოლაში მონაწილეობა ყარსისა და ბათუმის ბეგლარბეგებს და გურიის მთავარსაც დაევალა. მანუჩარმა შემწეობა სვიმონ მეფეს სთხოვა. ქართლის მეფე სიძის დასახმარებლად სამცხისკენ დაიძრა. ოსმალები მოვლენათა ასეთ განვითარებას ელოდნენ და ფერჰად ფაშამ საპასუხო დარტყმა განახორციელა. ოსმალთა ჯარის ნაწილი თბილისის გავლით გორისკენ დაიძრა და ეს ქალაქი დაიკავა. ამან სვიმონ მეფე აიძულა უკან, ქართლში, დაბრუნებულიყო. მანუჩარი მარტო აღმოჩნდა ოსმალთა პირისპირ. ამ უკანასკნელებმა ახალციხეს შუტიეს და აიღეს კიდეც. მდგომარეობას ისიც ართულებდა რომ ოსმალთა მხარეს ჯაყელთა მოწინააღმდეგე ფეოდალები

<sup>63</sup> თომაზო მინადოი გვ. 154-155

<sup>64</sup> შარაშიძე გვ. 54

<sup>65</sup> სვანიძე გვ. 162

<sup>66</sup> სვანიძე გვ. 163

<sup>67</sup> შარაშიძე გვ. 55

იბრძოდნენ. მათ შორის ყველაზე მეტად კოკოლა შალიკაშვილი აქტიურობდა.<sup>68</sup> მანუჩარი უმძიმეს მდგომარეობაში აღმოჩნდა და იძულებული გახდა სამცხე დაეტოვებინა. „მეფე სვეტიცხოველს მივუხდით აღარ შეაბეს მესხთა. თემი დაარბიეს და წავიდეს. ბევრი მოღალატე შემოადგეს პატრონს მანუჩარს. ვეღარ დაუდგნა და ახალდაბას ცოლი წაიყუანა და წავიდა.“<sup>69</sup>

მანუჩარ ჯაყელის თავდადებულმა ბრძოლამ შედეგი ვეღარ მოიტანა. მესხეთის დასაპყრობად ოსმალთა მიერ თითქმის ერთი საუკუნის მანძილზე წარმოებული ბრძოლა დამთავრდა. ეს მხარე ოსმალეთის იმპერიის შემადგენლობაში მოექცა.

1603 წელს შაჰმა აბას I-მა ოსმალეთის წინააღმდეგ ახალი ომი დაიწყო. მანუჩარ ჯაყელისთვის ეს სამცხის გათავისუფლებისათვის ბრძოლის განახლების შესაძლებლობას ქმნიდა. მანუჩარი ჭკვიანი კაცი იყო, დიდი გამოცდილების მქონე და ცხადია შაჰაბასისი ზრახვებთან დაკავშირებით ილუზიები არ ექნებოდა. უბრალოდ სხვა გამოსავალი არ არსებობდა. პირველ ეტაპზე, „ჩემი მტრის მტერი ჩემი მეგობარია“ პრინციპიდან გამომდინარე, მანუჩარს ყიზილბაშები ოსმალთა წინააღმდეგ უნდა გამოეყენებინა, სამცხე გაეთავისუფლებინა. შემდეგ რა მოხდებოდა ეს უკვე მრავალ ფაქტორზე იყო დამოკიდებული და ზუსტად არავინ უწყობდა. ცხადია ერთი რამ, ირან-ოსმალეთის მორიგი ომის საწყის ეტაპზე შაჰისა და მანუჩარის ინტერესები დროებით ერთმანეთს დაემთხვა. სათანადო მოლაპარაკებების წარმოების გამო მანუჩარი ისპაჰანში იმყოფებოდა, სადაც ის პორტუგალიის ელჩმა ანტონიო გოვემ იხილა. მათი შეხვედრა 1603-1604 წლებში უნდა მომხდარიყო.<sup>70</sup>

1607 წლის 23 ივლისს ქართველებისა და სპარსელების გაერთიანებულმა ჯარმა ახალციხე აიღო. ირანის შაჰმა მანუჩარ II-ის მეუღლის ელენეს თხოვნით სამცხის მმართველად მისი ვაჟი მანუჩარ III დანიშნა. მართებულია მოსაზრება, რომ ამ დროისთვის მანუჩარ II უკვე გარდაცვლილი უნდა ყოფილიყო. წინააღმდეგ შემთხვევაში აბას I სამცხეს მას ჩააბარებდა. ამიტომ შეგვიძლია ვივარაუდოთ, მანუჩარ II ჯაყელი 1605-1607 წლებში უნდა გარდაცვლილიყო. სამწუხაროდ უცნობია მისი დაკრძალვის ადგილი.

საინტერესოა ისკანდერ მუნშის ცნობა მანუჩარის ოჯახის შემდგომ შესახებ, „არზრუმის მოსაზღვრე ახალციხის ველაიეთი და ყარაჯა არდაჰანი მესხეთს ექვემდებარებიან. ალექსანდრე მაკედონელის სადარი შაჰის მოჰამედ-ხოდაბანდეს დროს, როცა ლალა ფაშა ირანზე ლაშქრობისას მასზე გამოვლით მოვიდა შირვანში, პირველად ახალციხის ვილაიეთი და მისი მიმდგომი ადგილები დაიპყრო და ციხეები გაამაგრა. სანამ მანუჩარ-ხანი ცოცხალი იყო, ის ცდილობდა დახმარებოდა

<sup>68</sup> სვანიძე გვ. 165-167

<sup>69</sup> შარაშიძე გვ. 55

<sup>70</sup> ნარკვევები გვ. 305

სიმონ-ხანს. მის შემდეგ ოსმალები იმ ქვეყანაში გაბატონდნენ და სიმონ ხანის ქალიშვილი, რომელიც მანუჩარ-ხანის მეუღლე და ენერგიული მანდილოსანი იყო, თავისი პატარა ვაჟიშვილით და მათი ოჯახის ერთგული მსახურების მცირე რიცხვით იმ ქვეყნის ტყეებსა და მთებში აფარებდა თავს. იმ ოცდახუთი წლის განამავლობაში, როცა მთელი საქართველო ოსმალების ქვეშევრდომი და მოხარკე იყო, ხსენებული მანდილოსანი ბევრს ეცადა, რომ როგორც საქართველოს სხვა მხარეებში ოსმალები ქართველ მმართველებს უთმობდნენ ქვეყანას და ხარკის აღებით კმაყოფილდებოდნენ, ისე მისი ვაჟისთვისაც, რომელიც ათაბეგად იწოდებოდა, დაეთმოთ ქვეყანა და ხარკი აეღოთ. ოსმალები არ დათანხმდნენ ამას. მხოლოდ ერთი ნაკვეთი მისცეს იმ ველაიეთში მას და დედამისს ცხოვრების სახსრად და ისიც გაჭირვებით ატარებდა ცხოვრებას.<sup>71</sup>

რთული სათქმელია რა პერიოდის ვითარებას აღწერს ირანელი ისტორიკოსი როდესაც ამბობს, რომ ოსმალებმა „მხოლოდ ერთი ნაკვეთი მისცეს იმ ველაიეთში მას და დედამისს ცხოვრების სახსრად და ისიც გაჭირვებით ატარებდა ცხოვრებას.“ ხდება ეს 1607 წლამდე, როცა მანუჩარი შაჰთან იმყოფება და მისი ოჯახი სამცხეშია, თუ 1613 წლის შემდგომ, როდესაც სამცხე კვლავ ოსმალეთის შემადგენლობაში შევიდა. ალბათ უფრო 1613 წლის მერე. ნაკლებად სარწმუნოა, რომ ოსმალებს რამე დათმობთ მანუჩარის მეუღლისთვის მაშინ როცა მისი ქმარი შაჰთან იმყოფებოდა.

მძიმე პერიოდში მოუწია მოღვაწეობა მანუჩარ ჯაყელს. ხშირად არჩევანიც არ ჰქონდა. საკუთარი სამფლობელოს გადარჩენისა და შენარჩუნების მიზნით ოსმალთა ვასალობაც იკისრა, ერთი პერიოდი ისლამიც მიიღო, მათ ლაშქრობებშიც მონაწილეობდა. თუმცა ყოველივე ამას აღმოჩნდა. ოსმალები მხოლოდ დროებით დათმობებზე მიდიოდნენ. სხვა გამოსავალი აღარ არსებობდა და მანუჩარ ჯაყელმა ოსმალთა წინააღმდეგ ბრძოლა დაიწყო, თუმცა შექმნილი ვითარების გამო ეს ბრძოლა თავიდანვე განწირული იყო.

---

<sup>71</sup> ფუთურიძე, გვ. 71

## Manuchar II Jakeli

Manuchar Jakeli was born in 1550. His father Kaikhosro was Atabag of Meskheta. Whereas his mother, was from Mukhranel-Bagrati family.

In 1576-78 years, there was great rebellion against Jakeli family in Saatabago. Shalikashvili family led the rebellion. Manuchar was very active during the war, from time to time he was acting independently or with his elder brother Kvarkvare.

Meanwhile, war of Iran-Osmali began. On 9th August of 1578 year, Osmali defeated Kizilbash army near Childir. Manuchar was watching battle from slope of the mountain with six thousand armed noblemen. After the battle, he visited victorious Osmali. Commander of the army treated Manuchar with great respect and told described to the Sultan this fact as of vitally important meeting.

On 3rd June of 1579 year Manuchar and Kvarkvare visited Constantinople. On 9th June sultan hosted them. Manuchar took Islam and on 25th of June of 1579 year, Sultan Murad III appointed him as Pasha of Childir (Akhaltzikhe).

In 1582, Manuchar Jakeli began rebellion against Osmali in Samtskhe and contacted king Svimon. Osmali tried to defeat him for several times, but with no result.

In 1587, Sultan sent big army against Manuchar Jakeli and king Svimon. New Pasha of Childir was given a mission to defeat rebels. Manuchar Jakeli's devotion ended without result. He was obliged to leave Samtskhe and moved to Kartli.

In 1603 Shah Abas I began war against Osmali. This was an opportunity of liberation of Samtskhe and renewing the battle for Manuchar Jakeli and therefore he visited Shah. Manuchar must have died during 1605-1607 years, while visiting Iran.

## Манучар II Джакели

Манучар Джакели родился в 1550 году. Его отцом был правитель Месхети Атабаг Каихосро II, а мать принадлежала к роду Мухранских Багратионов.

В 1576-1578 годах в Саатабаго, против семейства Джакели, происходило большое восстание, во главе которого стояли Шаликашвили. В этой междоусобной войне активно участвовал Манучар. Он действовал иногда один, а иногда вместе с братом Кваркваре.

Тем временем началась новая Ирано-Османская война. 9 августа 1578 года у Чилдира Османи нанесли поражение армии Кизилбашов. За битвой, со склона горы в сопровождении шести тысячи воинов наблюдал Манучар. Затем он явился к победителю. Османский полководец принял Манучара с большой почестю и сообщил об этом султану, как о значительном явлении.

3 июня 1579 года Манучар и Кваркваре прибыли в Константинополь. 9 июня они предстали перед Султаном. Манучар принял Ислам и 25 июня 1579 года султан Мурад III назначил его Чилдирским (Ахалцыхским) Пашой.

В 1582 году в Самцхе Манучар Джакели начал антиосманское восстание и связался с царем Свимоном. Османы несколько раз попытались разгромить его но безрезультатно.

В 1587 году султан послал новое большое войско против Свимона и Манучара. Новому паше Чилдира было велено разгромить Манучара. Самоотверженная борьба Манучара не спосла ситуацию. Он был вынужден покинуть Самцхе и перейти в Картли.

В 1603 году Шах Абасс I начал войну против османов. Это дало возможность Манучару возобновить борьбу за освобождение Самцхе и он явился к Шаху. Находясь в Иране, между 1605-1607 годами, Манучар скончался.